



Broj:

Sarajevo, 15.03.2023. godine

16-03-2023

PARLAMENTARNA SKUPŠTINA BOSNE I HERCEGOVINE
PREDSTAVNIČKI DOM

07-02-2-669/23

Predmet: Prijedlog rezolucije o pravu na slobodu izražavanja u Bosni i Hercegovini u skladu sa evropskim standardima, dostavlja se

Na osnovu člana 163. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20 i 53/22), podnosimo Prijedlog rezolucije o pravu na slobodu izražavanja u Bosni i Hercegovini u skladu sa evropskim standardima.

Predlažemo da se u dnevni red 5. sjednice Predstavničkog doma Parlamentarne skupštine Bosne i Hercegovine zakazane za 20.03.2023. godine kao dodatna obavezna tačka uvrsti **Prijedlog rezolucije o pravu na slobodu izražavanja u Bosni i Hercegovini u skladu sa evropskim standardima.**

U prilogu dostavljamo tekst Prijedloga rezolucije.

S poštovanjem,


Poslanici u Predstavničkom domu Parlamentarne skupštine BiH:

Aida Baručija

Sabina Ćudić

Rejhana Dervišević


Jasmin Imamović




Mia Karamehić-Abazović



Predrag Kojović



Saša Magazinović



Albin Muslić



Nihad Omerović



Ermina Salkičević-Dizdarević



Denis Zvizdić



PRIJEDLOG

Polazeći od činjenice da Univerzalna deklaracija o ljudskim pravima svima garantuje „pravo na slobodu mišljenja i izražavanja, što obuhvata i pravo da ne bude uznemiravan zbog svog mišljenja, kao i pravo da traži, prima i širi obavještenja i ideje bilo kojim sredstvima i bez obzira na granice“;

Ističući da je Međunarodni pakt o građanskim i političkim pravima zajedno sa Opcionim protokolima sadržan u Ustavu Bosne i Hercegovine u katalogu o ljudskim pravima;

Imajući u vidu da Evropska konvencija o ljudskim pravima i osnovnim slobodama definiira slobodu izražavanja kao jedan od suštinskih osnova demokratskog društva i jedan od osnovnih uvjeta njegovog napretka i samoostvarenja svakog pojedinca i zabranjuje proizvoljno uplitanje predstavnika javnih vlasti i drugih privatnih pojedinaca na pravo neke osobe na slobodu izražavanja;

Cijeneći stajalište Evropskog suda za ljudska prava potvrđeno kroz više presuda da „sloboda izražavanja predstavlja jedan od osnovnih temelja demokratskog društva i preduvjet je za njegov napredak, kao i za vlastito ispunjenje svakog pojedinca“;

Naglašavajući da Ustav Bosne i Hercegovine svim licima na teritoriji Bosne i Hercegovine garantuje slobodu izražavanja, bez diskriminacije po bilo kojem osnovu kao što je spol, rasa, boja, jezik, vjera, političko i drugo mišljenje, nacionalno ili socijalno porijeklo, povezanost sa nacionalnom manjinom, imovinom, rođenjem ili drugim statusom;

Uvažavajući činjenicu da je Bosna i Hercegovina 2003. godine dekriminalizirala klevetu u zakonodavstvu na teritoriji cijele Bosne i Hercegovine;

Podrctavajući da je jedan od 14 prioriteta iz Mišljenja Evropske komisije o zahtjevu za članstvo BiH u EU „garantovanje slobode izražavanja medija i zaštita novinara“;

Na osnovu člana IV.4.e) Ustava Bosne i Hercegovine i člana 163. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20 i 53/22), Predstavnički dom Parlamentarne skupštine Bosne i Hercegovine, na __. sjednici održanoj, __. __. 2023. godine, usvojio je

REZOLUCIJU O PRAVU NA SLOBODU IZRAŽAVANJA U BOSNI I HERCEGOVINI U SKLADU SA EVROPSKIM STANDARDIMA

1. Predstavnički dom Parlamentarne skupštine BiH najoštrije osuđuje najavu usvajanja Zakona o izmjenama i dopunama Krivičnog zakonika Republike Srpske kojim se, između ostalog kriminalizuje kleveta kao krivično djelo sa visokim novčanim sankcijama.

2. Predstavnički dom Parlamentarne skupštine BiH se protivi svakom pokušaju da se na bilo koji način ugrozi ustavno pravo na slobodu izražavanja i da se finansijski i na svaki drugi način oteža rad nezavisnih medija, što bi za posljedicu imalo uvođenje autocenzure. Zaštita ugleda i privatnosti, te borba protiv dezinformacija važni su ciljevi, ali oni se ne smiju ostvarivati na štetu slobode izražavanja kao jednog od osnovnih načela svakog demokratskog društva.
3. Predstavnički dom Parlamentarne skupštine BiH odbacuje i osuđuje plasiranje lažnih vijesti, neistina, ciljano narušavanje ugleda i druge oblike zloupotrebe kao sredstvo političke i bilo koje druge borbe. Predstavnički dom Parlamentarne skupštine BiH smatra da pitanje jezika mržnje i plasiranja lažnih vijesti treba biti adekvatno regulisano u skladu sa međunarodnim i evropskim standardima iz te oblasti i ne na način koji predstavlja grubo gušenje slobode govora i medijskih sloboda.
4. Predstavnički dom Parlamentarne skupštine BiH zadužuje Vijeće ministara Bosne i Hercegovine i poziva Instituciju ombudsmena za ljudska prava BiH da poduzmu sve aktivnosti iz svoje nadležnosti kako bi se kroz izmjenu zakona, podzakonskih akata i izradu preporuka i specijalnih izvještaja pronašao adekvatan balans između zaštite prava na slobodu izražavanja i borbe protiv dezinformacija, u skladu sa legitimnim ciljevima koji se žele postići u demokratskom društvu.
5. Predstavnički dom Parlamentarne skupštine BiH poziva međunarodne institucije, međunarodne organizacije, medije, organizacije civilnog društva, te sve druge organizacije koje se bave zaštitom medijskih i drugih sloboda na zajedničku saradnju u borbi za otvoreno i slobodno demokratsko društvo.